

Octavia le ba 8

E ngotswe ke Jacqui L'Ange | Ditshwantsho ka Julie Smith-Belton



Octavia wa Okthophase o ne a dula morung wa lehlaka, metsing a phodileng a hlakileng lebopong la lewatle le Afrika.

Motsheare, o ne a tswa ka tlasa lehaha la hae ho tla sesa dipakeng tsa mahlaku a malelele mme a bapale kganyeng ya letsatsi le phunyeletsang ho tloha hodimo.

Ho ne ho ena le dikhorale tse mebala e kganyang tlase santeng, mme ho ena le mahaha a mofuthu a ho ipata. Octavia o ne a rata tshingwana ya hae, hobane o ne a ena le leqheka le ikgethang – o ne a ka iphetola mmala ho nyalana le eng kapa eng eo a phomotseng ho yona. Hape o ne a ka fetola le letlalo la hae hore le shebahale le le mahwashe jwaloka majwe, kapa le hlaba jwaloka chorale.

Sena se ne se etsa hore a bapale boleke-maipatile hantle haholo, hobane metswalle ya hae e ne e sa kgone ho mo fumana! Ka nako e nngwe o ne a ipatla hantle hoo metswalle ya hae e neng e teneha ke ho batlana le yena mme e itsamaele. Ebe o tla a sesa kamora bona ka ho sututsa metsi a mangata ka mora hae.

Empa o ne a hlola a emisa ha a fihla ho shelofu ya lewatle.

Mona e ne e le moo bethe ya lewatle e neng e wela ka hara lefifi le letsholetsho. Octavia o ne a tshaba ho ya moo.

“Ke rata ho ba moo nka itshwareletsang ka ho hong,” a bolella metswalle ya hae e robedi ya hlooho ya kgomo.

“Re ya feela ha kgutshwane,” ba rialo, “mme re dula re kgutlela morao.”



Empa ho sa kgathallehe hore ba leka hakae, ba ne ba sa kgone ho etsa hore Octavia a tsamaye le bona. O ne a ba emela lebopong la shelofo, a tonetse lefifi le letsho ho fihlela a bona mebala e kganyang ya bona e hlahella lefifing mane.

Ka letsatsi le leng le tletseng difefo, metsi a ne a halefile e le ka nnete. Maqhubu a masweu a ne a otlana ka hodimo, mme maqhubu a ka tlase a ne a sututsa jwang ba lewatle ho ya kwana le kwana, mme a etsa motantsho wa dimela tsa lewatle.

Octavia a tsamaya ho ya batlana le metswalle ya hae haufi le shelofo ya lewatle – mme a sutuletswa hantle ka hodima lebopo!

Maqhubu a mo phetholela tlase a mo potapotisa. Ka ho tshoha, Octavia a ntsha enke e ntsho e kang ya jete. Jwale o ne a se a sa bone letho hohang – empa o ne a ntse a pitika a wela. Dipelo tsa hae tse tharo di ne di otlala ka thata, mme o ne a ikutlwa eka mpa ya hae e phethohetse ka ntle.

“Thusang!” a hoeletsa.



Lefifing, a utlwa ho ena le ntho e tshwarang le leng la maoto (dithenthekele) a hae. Le ne le kobehile le le boreledi.

“Ke o tshwere!” ha rialo Khalo wa lekgala.

“Le nna!” ha rialo Stella wa tlhapinaledi, a itshwereletsa ka le leng la letsoho le motsu ho leoto le leng.

“Le nna wa boraro!” ha rialo PJ shaka ya pijama.

Ka bonngwe, metswalle ya hae ya tswa lefifing mme e mong le e mong a itshwareletse leotong la hae.

Lefatshe la qalella ho tsitsa. Octavia a itshwareletsa ka thata mme a dumella hore ba mo tataise ho kgutlela tshingwaneng ya hae.

Yare ha ba fumana sebaka se lokileng, Ray a ala mapheo a hae ho ba sireletsa ho maqhubu a sefelo, mme bohle ba iphutha, ba thabetse ho ba mmoho.

Mme ka lebaka la leqheka le ikgethang la Octavia, o ne o keke wa tseba moo metswalle a le mong a qadileng mme ba bang ba qetella!



Octavia le ba 8

E ngotswe ke Jacqui L'Ange • Ditshwantsho ka Julie Smith-Belton

Mehopolo eo le ka buang ka yona

Octavia o ne a tshaba ho ya pele ho feta ntlha ya lewatle. O tshabang? O ka etsang hore o kokobetse ho tshaba ha hao ha o tshohile?

Ka kopo bolela nako eo ka yona o neng o tshohile mme motho e mong kapa ntho e nngwe ya o thusa.



Setshwantsho

Eya leqepheng la mosebetsi mona: <https://nalibali.org/story-supplies/activity-sheets>

Sebedisa setshwantsho sa ho qetela sa pale ho o thusa ho taka mmala metswalleng ya Octavia.



Ho bala

Bala pale ena hape mme o etse lenane la dintho tsohle tse fumanwang lewatleng.




Ho ngola

Etsa buka e lephaka ya sebopeho sa tlhapi kapa kopa motho e moholo hore a o etsetse yona. Ngola le ho tshwantshisa pale e mabapi le bophelo ba ka lewatleng bukeng ena. Kapa taka ditshwantsho ebe o kopa motho e moholo hore a ngole mantswe ao o mo jwetsang wona.



Mosebetsi wa matsoho

Penta bokahare ba lebokose ka boputswa ebe o etsa lefatshe le lenyane la ka tlasa lewatle ka ho sebedisa dikgetla, majwe a manyane le dibopuwa tsa lewatleng le dimela tseo o di entseng ka dimatheriale tse sebedisitsweng botjha le pampiri ya mebala.



Tshebetso

Ikgakanye eka o sebopuwa sa lewatleng kapa semela sa lewatleng: kebesela jwalo ka semela sa kelp, sesa jwalo ka tlhapi e nyane, sesa jwalo ka tlhapi e kgolo, tsamaya ka lekeke jwalo ka lekgala mme o tsamaye jwalo ka okthophase ka metsing.

